

De Kwakel



CV de Moerebuuk
Jaorgank 61



Èller darters nao Èlly Pelly

Blz. 12

Loes zingt vibrato

Blz. 6

Erik zuut ze vlege

Blz. 14

Lekkere bürgermeister

Blz. 11

Mantelzörger bic de tied

Blz. 11

Jeugdprins Stan II

Vastelaovendj 2026



De Kwakel

CV DE MOEREBUUK
Jaorgank 61

Proclamatie



Ich, prins Tim de 1e, 75e prins van de Moeërebuuk.

In 1988 gebore in 't zekehoes van Wieërt mer gelökkig weer snel nao Èll, 't Moeërelandj. Zoon van Peter en Connie Heijkers-Arends, de aodste van de 3 van Benders naeve mien breurkes Rick en Mike. Ouch al zeen ze allebei groeëter as mich, sterker zeen ze zeker neet.

Same mèt mien prinses Myrthe Koene van de Graasbörgers oet Zösterere, woëne wae op de Seringenstraat, mèt ós zeunkes Raf en Soy.

Vastelaovendj vere det geit mich good aaf; dao bèn ich groeët mèt gewore, ofja, mèt opgegrudj. Same mèt mien adjudante en heur dames; aod prins Luuk & aod prinses Robin, Cuup & Sandy en Bastiaan & Femke gaon wae same mèt uch dees daag flink gaas gaeve.

In 't dagelijks laeve bèn ich edere waek te vinje op de wirk-lieër-boorderie Genegenterhof van PSW in Grathem, woë ich edere kieër weer mèt plezeer gaon wirke en mèt de sjoenste verhaole thoes kóm.

In miene vrieje tied bèn ich fanatiek lid van waterskiclub 'de Maasmasters', woë ich veural in de zomermaondje mien kunste laot zeen en mien passie oetoeffen op de Maas.

Ieërder bèn ich jaore lang voetballer gewaesj bie 't sterreteam van RKESV en DFO, 't 3dj!

Mer noe geneet ich van mien pensioen en slaop ich edere zunig lekker oet... Oh, nae wacht, de jónges zeen gewuuen óm half 7 wakker.

Verder bin ich 2x per jaor te vinje in 't Brook mèt stichting Spook óm d'r ein sjieke spoëketocht van te make.

Ich doon daonaeve al 21 jaor mèt aan de Bóntje Aovendj mèt de groep 'de Prutsers', óm veur uch ein ruig stökske te bringe op de bühne.

Eder jaor steit 't lèste wiekend van juni ein wiekendje TT-Assen geplandj in miene agenda, woë beer drinke hoeëger in 't vaandel steit, as de race zelf.

Verder gaon ich gaer mèt mien vrinj ein pilske drinke bie 't sjoenste café van Limburg, 'de Bachelorclub'.

Neet ónbelangriek óm te vertèlle is, det ich trots lid bèn van VV de Prutsers; eine vrinje- en vastelaoves-groep. Jaore lang wages gebouwdj, mètgedaon aan de leedjesaovendj en dèk ozze naam ieër aan gedaon... Mer altied stinge wae mèt plezeer veuraan tiejes de vastelaovendj. Tegewoordig zitj 't groeëtste deil van ozze groep bie de raad of steit noe naeve mich op de bühne.

Bie de gratie van Groeëtvorst Jan, Groeëtvorst Henri, Vorst Steef en de Raod van Elf verklaor ich 't volgendje:

- Det ich mèt mien prinses Myrthe, mien adjudante Luuk, Cuup, Bastiaan en heur dames Robin, Sandy en Femke gaas gaon gaeve en d'r alles aan gaon doon óm van deze vastelaovendj ein geweldjig dik fieëst te make!
- Det wae dit same doon mèt de jeugdprins en zien adjudante en de jeugdraod.
- Det de men en de dames van de Raod van Elf same mèt ós d'r te gekke daag van gaon make.
- Det wae dit jaor ouch weer moge gaon genete van live muziek van de Ellenthaler en de Koalderbend.
- Det VV de Prutsers dit jaor geine wage hoofjt te bouwe, mer heur bouwskills doorgeuftj aan VV de mini Prutsers!
- Det de Bachelorclub dees fieëstdaag de ieërenaam maag dragen van 'Prinsecafé'.
- Det gae allemaol net asof mójtj doon det de Zösterse weurd van prinses Myrthe, Èlls zeen.
- Det ich dees daag zal regere in de Orde van de Waterski!

En dit alles ónger mien motto:

**Normaal gaon ich waterskiën op de Maas,
mer noe in 't Moeërelandj gaef ich gaas!!! Alaaf!**



CV DE MOEREBUUK Jaorgank 61

Leef Moeërebuuk,



Op 8 oktober, net nao Ëll kirmis, geit bie ós de deurbel. Myrthe en ich wore same de jónges nao bed aan 't doon en 't waas ieërliek gezagt eine chaos. Op ein gegave moment krieg ich ein meldjing van miene camera-app. Dus ich kiek op de camera... Steef aan de deur. Wiezoeë kumtj dae aan de deur en den ouch nog rondj 19:30 oor, den is 't spitsoor hie. Merjeh, det zoj Steef toch mótte wete mèt ouch 2 jonges van dezelfde laeftied?! Veur det ich ónger waas, waas Steef alweer weg en dus ging ich weer trök nao bove. "Enne?" zeet Myrthe, "dae kump toch neet vraoge óm prins te waere, toch?!" Mien hert ging toen ein flink paar sleeg sneller kloppe. "Gein idee... hae is al wèg." Toen belde Steef mich op; oké, eine kieër good aom hole en oppakke. "Timooooo maot... enne, wie is 't?! Ich sting aan de deur want ich haaj Raf ziene jas bie Tuur in de tas gedaon, dae kwoom ich trök bringe."

"Meinse neet... nog neet gemistj dae jas. Wae zeen de jónges in bed aan 't doon. Steur mer efkes ein foto van dae jas." Op det moment dink ich det Steef 't net zoë werm haaj as ós. Mer de foto kwaam mer neet en de spanning waardje toch waal mieër. Toen ging de bel weer. En weer Steef, dae wae nateurlik drek binne hóbbe gelaote. "Jeh, de snaps nateurlik waal det ich geine jas bie mich hób... Wils dich de 75ste waere?"

Ich kiek Myrthe aan en we zagte tege elkaar: "dit is eindelijk de daag!" Nateurlik woeëje wae drek jao zegge, mer ós 2 jónges gaon veur alles en wae motte ieëst zeker wete det 't good veur de jónges geregeldj is. Nateurlik vonj Steef det gein probleem. 't Besef mós, toen Steef wèg waas, nog kómme, mer waat vónje wae det mega ruig. Nao eine nacht woeë-in wae hoeëgoet 2 oor geslaope hóbbe, ging de regelmodus drek aan. Ós hulptroepje waardje ingesjakeldj en al gauw kregte wae ein akkoord. Yes, yes, yes!!! Noe drek Steef get laote wete. "Jao, wae daon 't!", toen begós ós avontuur. Ós adjudante vraoge, kleijer regele, oppas sjema's make, miene steek regele (ouch al ging det neet vanzelf), óngersjeijing ontwerpe en alle sjieke dinger die bie miene noewe titel huuere. De aafgeloupe tied sting veur ós de vastelaovendj al hieëlemaal aan en zeen wae d'r edere daag mèt bezig gewaesj, waat ein sjiek gevoel! Mer noe maag ederein 't wete: Ich bèn de 75e prins van de Moeërebuuk!

Leef Moeërebuuk, ich wins uch eine te gekke vastelaovendj toe en det wae d'r same ein kei sjiek fieëst van moge make, ALAAF!

Prins Tim!



Dao keek geine haan haer óm

Nao ein lang verbouwing is 't hoes van Rick en Joreth den eindelijk zoë good as klaor, tied om trök te kieke. Det hoes haaj al driekwart jaor te kouw gestange veurdet zie d'r haer ginge kieke. Joreth: "Toen der tied kraaidje d'r geine hóndj nao."



JAMMERDAN

Nao eine gezellige Bóntje Aovendj leep 't 'n klein bietje oet de handj. Iris Cauven haaj 'n paar drenkskes op en belandje op de afterparty bie aod prins Noud. Rick Camp zagt det de receptie vanne Rabbedabbe aafgelastj waas, det sjildje dus weer ein activiteit op de drökke agenda. Iris vroeg zich vervolgens hel op aaf woeërom ze de Ramadan aaf zoeëje lasse?!



Wisj dj'r al..

- det Leonne Heijkers net get te vreug bevalle waas van dochter Fem;
- det men det in medische terme 'n "randprematuurtje" numtj;
- det papa Jordi d'r ein paar waeke later pas achter kwaam det 't gein "ramp" prematuurtje waas.



Glaashelder

Joost haaj d'r op eine dónderdigaovendj weer eine dreij aan gegaewe. 's Nachts óm half 4 stroekeltj hae euver ziene nistel en vèltj zien gezicht kapot. Thoes kiekjt t'r inne spiegel. Hae zal toch echt nao de HAP mótte, dus hae meuktj Maud wakker. Die is vanzelspraekendj erg gruuets op heure mins en bringtj hum mèt vól gemopper nao Wieërt. Einmaol dao weurtj Joost door de zuster mèt vól aandacht en zörg gehechtj. Ze vreugtj ouch nog of 't noe weer ein bietje geit mèt Joost. "Jao, noe waal weer", zeet Joost, "dich duis gelökkig waal leef tege mich."

Maud heet óngertösse bedachtj wie Joost 't weer good kan make: "De rame mótte weer gelaptj waere en dich geis zörge det die zuver kómme!" Joost dinktj gelökkig in oplossinge en neet in probleme, dus hae beltj eine ramelapper óm 't klusje te klaore. "Maud heet neet gezagtj det ich ze zelf most poetse."



Groei talent

In 't aafgeloupe seizoen speuldje bie Ajax eine speuler mèt de naam Fitz-Jim. Dae speuldje neet onaardig en waerdje den ouch dèk genumdj door de commentatore. Leike van Voermans, dae euverlòptj van 't voetbalverstandj, stóng verbaasdj te loestere: "Ich wist neet det dae Mitch Gym zoë good kos voetballe!"

Van eine kaoje kirmis thoeskómme

Kaojsjottel is nog steeds ein hieël populair ónger de klantje van de slegter. Mieër den ins is dae den ouch oetverkocht. Wilbert Stals stóng in de winkel wie eine klantj aan hum vroeg of ze nog kaojsjottel haje. "Nae", zeet Wilbert, "dae is op vandaag". De klantj reageerdje dao nogal veróntwaardigd op, mer Wilbert leet zich neet kinne: "Veurige waek haje we 2 kilo euver, toen hób ich uch neet gezen!"



Wisj dj'r al..

- det Eefje Koolen gaer bij de fysio in Èll woeëj wirke;
- det ze zoë fanatiek waas det ze ein waek te vreug versjeen op heur sollicitatiesprek;
- det Eefje oeteindelik ein waek later trök mocht kómme en asnog is aangenómme.





Neet veur ein gaat te vange

In paniek kumtj Dorthe Jeroen hole: "Volges mich hōbbe we ein groeët bieëst inne veurtuin, dae heet dao ein hol gegrave!" Gewaopendj mèt ein sjōp vluugtj Jeroen nao boete. Mer al snel zuut hae det d'r hieëlemaol gein reje is veur paniek: "In det gaat sting net nog 't geboortebord, det hōb ich desmōrge d'r oet gehooldj."



Thoesbezōrgdj

Joeri waas veur 'n klus rōndj aan 't rieje. Hae heet honger en kumtj toevallig langs de McDonalds. Hae beltj ziene kompaan Sjoerd op of hae ouch get wiltj: "Zèg Sjoerd, 't steur van de bakwage duit raar. Hae trèktj bie de McDonalds opins nao rechts... Wils se misjien ouch gèt aete?" Sjoerd is altied waal in veur get lekkers. Effe later beltj Joeri trōk: "wils se det trouwes thoes opaete of kōms se deze kantj op?" Sjoerd itj 't leefste thoes, mer heet ieëst nog ein vraag: "Is det steur van de bakwage al gemaaktj den?"

Timmerbedrijf · Houthandel
W. STEUTEN BV
Grathemerweg 49B
Kelpen-Oler
0495-652178
www.steulentimmerbedrijf.nl

Sinterklaasje kōm mer binne oppe zōk

"Tege nemes vertèlle he!", zoeë kwaam Steef mèt de wichter bie de bekker binne. 't Waas sinterklaostied en de jōnges haje de sjoon gezatte in de winkel. Noe kwome ze kiekē of dae goje Sint d'r ouch get ingedaon haaj. "Dju zèk, det haaj get aan ieër wae hie wore! Ich hōb thoes werkelijk alles aafgezōcht nao de sjoon van die jōng!"



RE-COLOR
Solutions in renovation



'Same' oppe tandem

Jan van Lemmen en Gert wore in Sint Oedenrode op vakantie en haje heure tandem mètgenome. Ze ginge op bezoek bij heur sjoënzōster in St. Michielsgestel. Vanoet de camping waas det twelf kilomaeter. Nao vief kilomaeter kwome ze in Schijndel en 't verkieërsleecht springtj op roeëd. Ze stoppe, Gert staptj aaf en strèktj zich effe de bein. 'T stopleecht springtj op greun en Jan zeet "Wae kōnne" en hae zètj drek aan. De accu op hoeëg gebroek en hieël snel op tempo. Jan genietj vanne ómgaeving en de rōst. Nao 20 minute steit dao 't bord Gestel en Jan dreitj ziene kop ein bietje nao achter en vreugtj: "Zulle wae veur Bea get Bossche Bolle koupe bie de bekker?" Gein reactie van de duopassagier. Jan kiekjt hieëlemaol achteróm en zuut det d'r nemes achterop zitj.

"Ich zal Gert toch neet in Schijndel hōbbe laote staon?" Hae dreitj de tandem óm en riedj trōk. Óngevieër twieë kilomaeter veur Schijndel kumtj hae Gert tege. Veuroeëje kop van het loupe, mer ouch van gift. "Ich hōb gerope det se most wachte, mer nae doe fietsdjes stevig door". "Door dae helm hōb ich dich neet gehuerdj." Toet in Gestel haaj Gert nuuedig óm Jan dudelik te make det hae 'ne groeëte suffert waas. "Zulle wae bie de bekker Bossche Bolle koupe veur Bea?" Toen ze det gedaon haje ginge ze op bezoek. Dao zeen gein verkieërdje weurd gevalle. Mer Bea zagt wie ze trōk ginge nao de camping "Gert, haot dich mer good vast aan ziene reem, want hae huertj dich neet".



De Kwakel

Bèste beinke veur

Mèt Keuningsdaag zitte Aylin en Stef Heijkers same mèt get vrinj op 't terras ane kade in Remunj. Ze make 'ne einzalgänger wies det ze sangerdaags gaon trouwe. Hae vónj 't kei sjiek en loesterdje aandachtig. Wie hae later vertèldje det t'r recent 'n aantal dierbare haaj verlore en bienao zien eige bein haaj mótte laote aafzètte, haaje ze zich toch get lullig geveuldj det ze dae mins veur de gek hóbbe gehaoje.



MART KESSELS
TRANSPORT
v.o.f.

Handdoekje leggen...

Lei Cauven en Carla haje de broeloft van Esther op Kreta. Ieëst ginge ze nog ein waek op vakantie. Ze vlogte op zaoterdigmiddig, mer 't appartement det ze geboektj haje waas pas op zunig besjikbaar. Lei en Carla dörfdje 't waal aan óm oppe bonnefoeëi ein hotel binne te loupe bie aankómst op Kreta. Helaas haaj heur vlucht twieë oor vertraging en daonao nog eine kieër drie oor. Det beteikendje det ze pas 's aoves laat op Kreta aankwome. Net veur het opstijge haaj Lei nog snel online ein klein hotel geboektj. De eigenaar waas vergaete heure mail te checke, woëdoor ze veur ein geslote receptie stinge en neet op heur kamer koste. Ze hóbbe toen mer heur handjdeuk op de strandjbedjes bie 't zwumbad gelagd en hóbbe de nacht dao doorgebracht. Wie 's mörge om 5 oor de anger gaste als ieëste heur handjdeuk bie het zwumbad woeëje lègge, wore ze verbaasdj det d'r al twieë minse loge.



Henderikx
Vastelaovendj Same! UW GROENE vakwinkel
Weverstraat 5A 6013 RA HUNSEL Tel.: 0495-786807
ALLES VOOR DHZ, TUIN & DIER



Neet zien bèste beintje veur...

Cas en Bo ginge aete bij Anneke en Leon. Anneke haaj kippepuuetjes gehoojdj bie Grillhuis Buys in Wieërt. 't Smaakdje Cas good en al aetendje vroeg hae zich hel op aaf: "Zoeëje dit eigelik de veurpuuej of de achterpuuej van de kip zeen?"

HANS NIES
TRANSPORT
ELL
transport@hansnies.nl
06-53520308



JH ENGINEERING & PROJECTS
06 - 25 51 29 92
WWW.JHENGINEERINGPROJECTS.NL
INDUSTRIËLE AUTOMATISERING | MACHINEBOUW | ROBOTISERING | PROJECT MANAGEMENT

Welke verdachte situatie kwoom langs op de buurtpreventie app?


- 1) Verdacht persoeën op zeuk nao eine tuinkabouter.
- 2) Verdacht persoeën duit eine babeltruc.
- 3) Theo Werkhoven löptj nao zien eige hoes.

Wisj dj'r al..

- det 't mèt de vastelaovendj 2025 oetzunjerlik good waer waas;
- det neet alle minse dao op veurbereidj wore;
- det Aylin verbrandje wie ze de optocht stóng te kieke.

Tunenke hoeëger zinge

Loes en Jac Cuypers ginge op 'nne zunig rundje Buskes wanjele. Drek bie de kèrk zaag Loes get inne struuk ligge. Ze paktje 't op en leep door. Óngertösse keke ze toch wat veur ein veurwerp Loes haaj gevónje. Ze vónje 't op eine microfoon lieke. Einmaal trök in 't dörp vroke ze versjillende veurbiegangers of die wiste waat 't veur eine 'microfoon' waas en of emes dae kwieët waas. D'r waerdje mèt de 'microfoon' rónjdgezeitj en dae waerdje grondig bekeke. Thoes mer ins kieke of wae hum aan de kal kriege, dachte Jac en Loes. Toen ze de 'microfoon' neet aan kregge höbbe ze zoon Tonny mer ins gevraagd. Dae keek hieël verwónjerd nao zien pap en dacht dae hëljt mich veur de gek. Toen Tonny in de gate haaj det zien aojers bloodserieus wore, heet t'r ze toch mer gezagd det 't eine vibrator waas. Loes sjaamde zich kapot; ze heet 't hieële dörp de 'microfoon' laote zien. Mer good det Tonny van alle apparate get aaf wètj.



In gesprek mèt Fer van Linje

Mèt muziek, veulse dich riek

De Kwakel ging op bezoek bie Fer van Linje. Wae haje gehuerdj det dae enthousiast waas óm mèt te wirke aan de leedjesaovendj. "Fer, vertèl ós ins euver dien leefdje veur de vastelaovesmuziek". Asse die vraog aan 'm stèl, kumpse vanalles te wete. Fer waas 'n jaor of dertieën toen hae same mèt Cor Sjroje bie café Palmen ein optraeje verzörgdje bie de bejaarde (de naam seniore waas toen nog neet oetgevónje). 'Coffer' heet het duo waat in **1979** van start ging mèt eige leedjes. Ze koste good zinge en ouch gitaar speule. Op zien 16e kwaam t'r bij de **Green Stars** (van te veure de borekapel) en vanaaf toen heet t'r zich eder jaor ingezatte veur de vastelaovendj en den veural veur de vastelaovesmuziek.



Hae sjriefft veur zien eige optraejes op de Bóntje Aovendje, mer ouch veur anger optraejes. Zoeë zaat hae inne organisatie van de leedjesaovendje, same mèt Theo Camp, Harm Maessen en Peter Huyskens. In **1995** waas ein jubileumjaor en dao waerdje ein CD oetgebracht mèt allemaol vastelaovesleedjes en leedjes van sommige Bóntje Aovendje. 't Jubileumleedje **'4 x 11 geit neet vanzelf'** waas door Fer gesjreve en van muziek veurzeen. In Studio Linje heet t'r tig leedjes en muziekstökke opgenome. Waeke aan gewirkjt en veul van genote. Hae heet völ artieste geholpe mèt leedjes en muziek. Hae trocht ein aantal jaore de ker van de Koalderbend, genumdj nao Tjeu van de Kaolder, eine groeëte fan van Èller blaosmuziek. Same mèt de Ellenthaler verdeile ze de muzikale óngersteuning bie de vastelaovesactiviteite. Fer schriefft al jaore veur de Prins ein muziekstök op basis van de veurkeursartiest vanne Prins. In **2000** waas Siem prins en zien motto waas "Waal of neet mèt ins, vastelaovends muziek is dit jaor PRINCE!" Toen Siem opkwaam bie ein activiteit speuldje de Koalderbend 't nummer "veurig jaor" 1999 van Prince. Det waas de enige kieër det Siem effe niks kost zègge. Fer is blie det deze vastelaovendj weer Èller artieste mètdoon aan de leedjesaovendj. En ouch is hae blie mèt 't initiatief van de V.V. de Fieëstbieëste, óm mèt ein spel de Èller vastelaovesleedjes te promote. Natuurlik hooptj hae det ouch oppe prinsewage ruumdje is veur **Èller muziek**. Aan Fer zal 't neet ligge, dae duutj en trèktj nog jaore lang aan de vastelaovesmuziek.

Fer bedanktj veur dit gesprek en ouch bedanktj veur diene inzèt veur de Èller muziek.



ZOMER CARNIVAL
21 augustus 2026



Zwaorgewicht

Tjeu van Lemme haaj 'n paar lemkes en hae waas benoedj wie hel det de bieëstjes gegruidj wore. "Kóm," zagt t'r tege Mo, "ich gaon die waoge en dich móst mich daobie helpe." Det deej Mo mer al te gaer, mer de bieëstjes wore al zoëë groeët det Mo ze neet drage kost. "Wèts se waat," zeet Tjeu, "den pak ich 't lemke en gaon oppe waog staon. Den móst dich opsjrieve wie zwaor wae same zeen en tèle wae dao later mien gewicht vanaaf." Det waas good. Mo noteerdje de gewichte nauwkeurig en waat bleek: de twieë lemkes wore precies aeve zwaor. 'Det kan toch neet kloppe', dacht Tjeu, 'want det ein laam is veul zwaorder den 't anger, det weit ich zeker.' Mer ze haje gewoge en Mo haaj 't good opgesjreve en oetgeraekendj. "Dao snap ich hieëlemaol niks van!" zeet Tjeu later tege Jeanny. "Jeh, des neet zoëë moeilik," zeet die druueg, "die waog geit mer toet 120 kilo!"



Klaar is Koos!

Nell en Koos ginge same mèt twieë anger stèlle ein paar daag nao pruuses. Noe mósse allewiel eine milieusticker hóbbe óm dao te moge rón dj rieje. Nell zoeëj dit waal ff regele en haaj online ein fijn site gevónje mèt gooj prieze. Nao ein dikke waek wachte maildje Nell mer ins mèt de vraag woeë dae sticker bleef. Prómptj waerdje d'r eine noewe opgesteurdj. Toen ouch dae nao ein paar daag nog neet waas aangekómme, begost de tied te dringe. Dus, Koos waerdje nao Venlo gesteurdj óm d'r eine -völ te deur- te koupe. Nao ein paar gezellige daag wèg, vónj Nell bie thoeskomst twieë enveloppe mèt milieustickers van de firma Reisklaar. "Jao," zeet Koos, "de reis is inderdaad klaar!"

Foute-Rick

Ein paar waeke naodet hae same mèt Emmy 't hoes van Rick en Elsemiek oppe Magnoliastraat haaj gekocht, waerdje Rick Corstjens 30 jaor. Det maag neet óngemerktj veurbie gaon, vónje zien vrinj. Dus zat Koen de tuin vol mèt groeëte borde. 'n Paar eurkes later wore die alweer wèg. Neet ómdet ze veur de raam stónge en teveul leecht wegheedje, mer gewuuen ómdet Rick en Emmy de sleutel van 't hoes pas 3 maondj later kregre.



De Kwakel



Ai, ai, holle klot

Leike ging ein paar daag mèt de vleger op vakantie. De kroeg waerdje in gooj hènj achtergelaote. Noe zoj Leike, Leike neet zeen as t'r 't toch örges neet fijn vónj det t'r de touwkes oet henj mos gaeve. Precies dae zaoterdig waas namelijk eine Belsje aovendj geplandj. Wie Wendy ónger 't aete nao de WC most, kost Leike 't neet laote óm toch ff te checke wie 't in Èll waas. Leike kreeg ein foto van ein leeg kroeg gesteurdj mèt de tekst: 'D'r is nog niks te doen.' 'Dju, dao baal ich noe van', dacht Leike en bestèldje zich gauw eine halve liter van det boetelands beer om vanne sjrik te bekómme. Neet vól later kreeg hae dezelfde foto van ein bomvol café. Hae waas neet in 't ootje mer in 't Al-tje genómme.



Woeërom? Dürüm!

De veterane van DFO'20 zeen kampioen gewore en det mos geveerdj waere. 's Daags d'r nao vroeg Ivette woeërom Chris eigenlijk mèt de auto thoeës kwoom om 2 oor 's nachts, terwiel die anger men al óm 21.00 oor thoeës wore. Det wist t'r zelf ouch neet mieër, hae waas gister mèt de fiets vertrokke, mer dae sting noe nog in Wieërt. Nao get óngerzoek bleek Chris nog de trein te hóbbe gepaktj veur ein lekker bruuedje kebab in Indjove. Daonao kocht t'r ein kaertje trök nao Wieërt, mer op 't perron bleek det de lèste trein al vertrokke waas. Toen heet t'r ouch nog 'nne taxi trök te mótte betale.

KLEMVAST

Micky ging post oet de brievebus hole, mer det lökdje neet. De sleutel vanne brievebus waas al waeke kwieët, dus hae probeerdje 't van bove oet. Hae haaj de brief te pakke! Allein ein probleem; noe zaat zien handj vast. Det is écht ónnuezel, dacht Micky. Nao get geklómme, zoeë ónopvallendj meugelik, zaag t'r pap thoeskómme. Micky heet Mathje gebeldj en dae heet hum oeteindelik oet zien benardje positie gehoordj.



Betitele

Bas Winkelmolen (3 jaor) ging bie gastaojer Ivette verstopptje speule mèt Dex. 'T waas drek doller pret. D'r kwome nog get aojers heur kinjer bringe, dus 't waas ff ein hectische bende. Bas zeet tössedoor tege Ivette: "woeë is dae meneer?" Ivette begreep neet weem Bas bedoeldje en dus ging Bas mer wiejer zeuke nao dae 'meneer'. Nao ein tiedje kwoom 'de meneer' teveysjien. Ivette keek raar op toen dit heure eige zoon Dex van 10 jaor waas.



Wisj dj'r al..

- det Marianne Wijen as doktersassistent wirktj in Eindhoven;
- det eine patiënt vónj det ze d'r good oetzaag: "Ja, je bent flink wat kilo's aangekomen."
- det Marianne verklaordje: "Jao, mer Wije waat det es, in de cultuur van dae man is det echt ein groeët complement!"



De Kwakel

CV DE MOEREBUUK
Jaorgank 61



van den Eertwegh
Tegel & Natuursteenwerken

11 versjille



Vreemdje gast

Anke Strous waas nog neet in 't noew hoes gewaestj, dus haje ze bie Carolien aafgesproke óm 't ein en 't anger veur de fanfaar te bespraeke. "Den krieg se innegang ein rónjdjeiding," haaj Carolien gezagt. Dae aovendj leep ze bekans de oprit op, wie d'r eine auto stopdje. Eine mins stapdje oet en keek zeukendj óm zich haer. Anke kóst de goje mins neet, mer zeet vrintjelijk: "Ich dink det we hie nao binne mótte." De mins zeet niks, mer löptj fijn mèt nao binne.

Carolien kumtj juust de trap aaf en kiekjt verbaasdj van dae mins nao Anke en weer trök: "En weem bès dich den?" "Jeh," zeet dae mins, "dees mevrouw zagt det ich hie binne móst zeen, ich höb ein aafsprak mèt Piet Custers."



Gaas d'r op

Smörgesvreug stopdje drie politieauto's bie Loes van de Kaolder en Rik. Loes en Rik waerdje verzóchtj óm mèt te gaon nao 't politiebureau. In de tössetied waerdje Siem ouch gebeldj en zoë haje ze alle drie 'ne eige politieauto ter besjikkig. De agente haje get vraoge euver bepaoldje flesse bie Loes en Rik in de berging. Ze höbbe netjes de agente te woord gestange, mer Loes begos toch get óngedöldjig te waere richting de aovendj en vroeg: "zèk wannieër kan ich weer gaon?". De agent vroeg: "Waarom? Heb je haast?" "Jeh", zeet Loes (mèt henj en veut) "ich höb vieë zitte en ich mótt gaon aquajogge". "Ich betaal veur det aquajogge dus dao wil ich gewuuen haer". De agent ging effe euverlègge mét collega's en toen koste Loes en Rik gaon. Loes waas oppe tied bie het aquajogge en heet zich hieël gegaeve.

DE LÈSTE LOODJES

Kim vanne Kaolder ging same mèt heure vrendj Stefan nao Linn Timmermans en heure vrendj Laurens, óm te vertèlle det ze in verwachting zeen. Vol enthousiasme zagt Laurens: "Oh, dus euver 10 maondj is 't dan zoe wiet!"



Wisj dj'r al..

- det de dames van DFO'20 op zunjigmörge op het veldj staon veur ein lekker pötje voetbal;
- det d'r op eine druilerige daag op het lètste moment helaas verlaore waerdje;
- det Esmee Kremers nao de wèdstried in het kleidlokaal zagt: "Jeh, kins neet altied 10 goeëje."



Wichterkal



De Kwakel



Iris (7 jaar) zeet tege mam:
"Ich wil later juffrouw waere en
op baby's passe." Broor Roan zeet
tegen zien zusje: "Den kónse babysitter



waere". Iris kiekjt gesjrokkte en reuptj: "Ich gaon echt
neet op baby's zitte!"

Mens-erger-je-niet

Lien (9 jaar) en Mia van zès ginge bie opa en oma
Kessels logere. Ze speuldje get spelkes, mer nao ein
poeës zeet Lien: "Wae vervaele ós". "Waat dootj
gae den thoes as gae uch vervaeldj?" vraogtj oma.
Woeëop Mia zeet: "Thoes doon wae allein mer
ruzie make".



Don (2 jaar) zoog op vakantie emes
in eine burka loupe.
Hae reuptj "mama
help ein spoeëk!"



Sofie Custers (10 jaar): "Mam zal d'r zoëe waal
zeen. Die is altied hieël snel, behalve as pap
haost heet."



Fleur Beelen (3 jaar) ging mèt de
familie nao Èll-kermis. Blijkbaar haaj
ze nog efkes nuuedig óm te winne
aan 't dörpse laeve, wie ze vroeg:
"Mama, gaon wae noe nao 't
volgendje plein?"



Kato Gerris (2 jaar) ging same mèt
Sjoerd, Nicole en Loek op vakantie. Dao sleep ze in ein
einpersoënsbèd. Wie ze weer trök waas van 'n waek
geniete, waas 't weer tied óm lekker nao heur eige bèd
te gaon. Ze leep nao bove, mer bie heur slaopkamer
bleef ze staon. Ze bekeek zich heur eige peuterbèd ins
tegooi en keek toen Nicole aan: "Mama, det pastj neet!"

Sep, Miek, Gijs en Abe Rietjens ginge same mèt
heur aojers oetaete. De jonges ginge nao 't aete nog
effe nao de wc. Toen Sep en Gijs van
de wc aafkwoome zoge ze Abe (9 jaar)
mèt zien henj in de prullebak.
De jonges sjote inne lach en vertèldje
Abe mer det 't geine handjdrueger waas.



Tuur (4 jaar) ging oppe camping allein op zien fietske nao 't WC-
gebouw. Wie hae trök kwaam verkondigdje hae gruuets: "Ik ben
alleen met de fiets naar het WC-gebouw geweest en ik ben nog
alijk!"

Sef Custers (4 jaar) op 't Jeugprinsebal:
"Mama, wannier mótte we noe nao dae
prins rope?"

De presentator vanne Bóntje Aovendj vroeg aan Teun
Eerkens (10 jaar) wie aod t'r waas. "Ich waer rónjdj 7 mei
örges 11 jaar."

Op de verjaordaag van Lien Kessels zeet opa John
tege Mia (6 jaar): "Volgendj jaar is dien zus 'nne
tiener." Mia zeet: "Det kloptj, want noe is
ze 'nne neger."

Florian van de Geijn
(4 jaar): "Weet je waar ik
woon, dan heb je hier zeg
maar de burens en
daarnaast woon ik."





Kort van stóf

't KVV is bezig heur leiding in ein noew jeske te staeke.

Oppe vergadering waardje versjillende stofstaaltjes bekeke en vergeleke óm ein juuste keuze te make.

Femke Wulms haaj ein good euverzicht welke pries bie welk stöfke huerdje.

Josje van Stiene sjrok van de koste en reep: "Zoeë völ veur zo'n klein stökske stóf?!"



BUURT.ELL

Voor al uw dagelijkse boodschappen!

LEON 6 TOOS DERKSEN • SEBASTIAANSTRAAT 12 • 6011RE • ELL

Kaisersmarren

Op Sofie heure verjaordag waardje d'r verse pizza's gemaaktj in de pizza-ove. As toetje ginge er pizza's in mèt nutella. Yvette vónj det herstikke lekker. 't Leek ein bietje op waat ze in Oeësteriek waal ins gegaete haaj, wie hèdj det noe ouch alweer? "Schmalschläger!" meindje Yvette.



Pure winst

José Beurskens geit mèt de auto nao de Spar (haaj ouch mèt de fiets kónne gaon!). Oppe trökweeg haaj ze gein zin óm de gordel vast te make veur det klein stökske. 't Alarm van heure auto huerdje ze nog lever aan den de gordel óm te doen. Toen zaag ze bie Loes vanne Kaolder de politie staon. Snel bije Heemels de oprit opgereje en toch mer de gordel ómgedaon. Alles zoeë onopvallendj meugelik, want in 'n concert van The Police haaj José gein zin in. Kalm as José altied is reej ze röstig heiwes. € 195,00 verdeenj door good op te lètte.



Ouch veur al uch **roeëd, gael** blome, mèt **greun** blajer mós se bie


Linders kwekerijen zeen

Maak dich mer gein zörg

Jeroen Bongers ging in Wieërt op stap. Later op de aovendj kumtj hae ein leuk, vlot vruike tege woeë 't leuk mèt kliktj. 't Kliktj zoeë good dae aovendj det Jeroen blijftj sloope bie det leuk vruike. Vreug op de mörge, óm half 6, geit d'r ein belgeluid aaf. 'Potdomme' dinktj Jeroen, 'ich haaj miene telefoon toch op stil gezatte?' De telefoon waal, mer zien noew smartwatch neet. "Weem beltj dao?" zeet det leuke vruike "Jeh, det is ós mam" zeet Jeroen. Wat bleek; moder Netty waas wakker gewore, mer Jeroen laag neet in bed, toch mer effe belle. "Oh" zeet 't leuke vruike, "woeëns dich nog bie dien mam?" "Jao, ich bèn mantelzörger."

BUURMAN EN BUURMAN

Ton en Ton van Kunnenbeemd óngerhaoje same de veurtuin en helpe deindanger bie handj en spandeenste as de situatie det vreugtj. Zoeë woeëj Ton gaer de vier leeghole. Hae waas good veurbereidj en haaj zich ein klein zwumbadje gekocht woeë 't water in kos waere opgevang. Vol gooi mood begoste ze aan dit klusje, mer al snel bleek 't ein ónbegónne zaak. Zoeë snel asse 't water in 't zwumbadje sjöbdje, leep 't d'r ouch weer oet. "Waat is det toch veur eine prul", grauwendje Ton hel op. Gekeke of 'dae prul' leekdje, mer ze koste niks vinje. "Laot mer zitte, we doon 't waal anges". De klus waardje op ein anger meneer geklaordj. Buurman Ton nóm zich det zwumbadje mèt, want mesjien mèt get plekkers waas dao nog get van te make. Blikbaar waas det geine hoeëgere wiskunde, want wie Ton de stop te gooi toemaakdje, waas de lekkage al verholpe.





NO WOMAN NO CRY



't Waas weer zoeë wiet: de Zwarte Cross. Zoeë wie eder jaor ging d'r eine groeëte groep vanoet Ëll ein weekend nao 't festival in de Achterhoek. De Zwarte Cross steit bekindj om zien versjillende podia; ónger angere de Reggaeuweide. Sofie van Logtestijn woeëj opzich waal nao dae Nederlenjer dae dao eder jaor speeltj, Bob Marley of zoeëget?



Baaltj wie 'ne stekker

Zoë Muysers ging mèt de auto vanne baas op paad. Dae auto sting nog aan de laadpaol. Zoë koppeldje de auto los vanne paol en ging op weeg.

De auto goof oppe door aan det de accu haost leeg waas. Ze beldje heure baas óm te vraoge wie dae opgelaje most waere. "Mèt de kabel dae inne kofferbak ligtj" klónk ane angere kantj vanne lien. Dae kabel haaj Zoë inne struuk gegoeëdj, dinkendje det dae bie de paol móst blieve.



Waat zeen wae op dees foto?

- 1) Tied veur noew lètters op 't logo bie de basissjoeël
- 2) Spelling dictee veur de oplèttendje kieker startj bie de ingank
- 3) Bieeinkomst dictees veur dyslecten

TALENTJE HUIER

Ze haje eine goje pot gedartj en zote gezellig ane bar, wie Noud bedacht óm same nao 't WK darts te gaon. "Det is sjiek man! 't Is missjien waal de lèste kieër det 't in 'Ally Pally' is. Kóm gank mèt!" Thoes vertèldje Joost vol enthousiasme aan Maud det Noud hum gevraagd haaj óm nao 't WK in Londen te gaon. Woeë op Maud vreugtj: "Óm mèt te doon?!"



NEET VAN SÓKKER

Jeroen vanne Kaolder zitj gezellig bie de Prairie op 't terras en bestèltj ein lekker frietje. Hae drinktj d'r zich nog 'n paar en dao kömtj zien aete aan. Good, want hae haaj ónger tösse hóngere wie ein paerd. "Mer nondedju Petra, d'r zitj sókker op miene friet!"

"O, ich meindje al ein paar daag det ich misjien sókker en zoot doorein gebroekdje." Ze booj aan óm noewe te make. Mer Jeroen waas d'r drek hieëlemaol klaor mèt: "Nae, laot mer. Den mót ich weer zoeë lang wachte."




Bès se BOB, blijf den op!

Op zaoterdig nao de KVV-waek weurtj aafgeslote mèt ein sjiek indjiefieëst veur de vrieuwilligers. Josje Stienen woeëntj tegenwoordig in Rooj en haaj mèt heure vrintj geregeldj det dae heur kwaam ophole. Hae waas allein neet te pakke te kriege wie 't tied waas óm heiwe te gaon. Mark Beurskens heet vervolgens zien pap opgetrómmeldj óm Josje nao Rooj te bringe. Frank haaj immers gezagt det de jónge al tied koste belle as d'r get waas.



De Kwakel

CV DE MOEREBUUK
Jaorgank 61



LAADPÄÖL VEUR ELEKTRISCHE AUTO'S

Ellske kreeg völ vraoge euver de laadpäöl die in Èll zoeëje kómme te staon of al geplaatstj wore. Dao zeen seffes mieër oplaadpuntje dan elektriske auto's. Ellske vindtj 't prima det elektriske auto's ouch op openbare parkeerplaatse opgelaje kónne waere. Mer op ein straot as de Groos, woë al drie oplaadpuntje zeen -ane verkieërdje kantj van 't speulveldje-, waerdje d'r nog twieë biegeplandj. Ellske vroeg ane gemeindje: "Mótte de minse van Hunsel in Èll oppe Groos heure auto vol laje? Mót d'r den veur die van Hunsel neet ouch ein fietsehok gebouwdj waere, óm heure fiets druueg wèg te kónne zètte? Missjien is 't baeter as d'r in Hunsel zelf ouch twieë laadpäöl kómme te staon". Ze höbbe geloesterdj. Die twieë laadpäöl kómme inne Paulsstraot te staon.

Ellske

Kritisch, sjeerp en oplèttendj. Det is Ellske. Dees aoj tante duit op heur eige meneer

verslaag van waat ze zoeë-al hie inne buurt heet gezeen of gehueerdj.



Oetbreijingsplanne in Èll

D'r doon allerlei verhaole de runje det d'r in Èll planne waere óntwikkeldj óm mieër hoeze gebouwdj te kriege. Dao weurtj gezagtj det ane Houtingestraot meugelikhede zeen. Dao liktj 'ne groeëte mooshoof (van Pieëre vanne Bekker) al jaore leeg, dao tegeneuver graze herte en ein hoon en dao zoeëj gebouwdj kónne waere. Sommige zègge al euver die planne inne hertewei: "Gaas d'rop," zeet Ellske, "laot mich neet lache, bie Loes waas al genógt gaas, niks mieër 'gaas d'rop'. Dao weurtj ouch gekaldj det achter 't kirkhof drie of veer hoeze gaon kómme. En as de kasse van Huub Verhaeg wèggaon, den is dao weer get sjoëens meugelik. Mer de meiste hoeze kómme op 't aod voetbalveldj en op de grondj bie Sjaokes. Ein kleinkindj (7 jaor) van Ellske vroeg: "Oma, kan mama mich den noe alvast insjrieve veur ein Knarrewuening?"



Haarboutique



lieëger pötje. gein water

Oppe Kampstraot steit inne bocht veur 't hoes van Rick en Joreth (vreuger bie Duuer) dèk ein flinke plas water. Det kan nörges op aan en blijft den lang staon. Rick trèktj bije de gemeindje ane bel en dao weurtj werk van gemaaktj. Toen 't klaor waas bleek det 't pötje get te hoeëg laag en det 't water d'r neet in kost loupe. Dao weurtj werk van gemaaktj en op zekere daag kómme ze met ein wirkbuss en drie straotemakers het probleem oplosse. Toen ze klaor wore zagte ze: "Zoeë, hel gewirkjt en alles netjes gekieërdj, dae mins zal zeker tevreje zeen". De buurman vroeg aan Rick: "Bèsse tevreje, heet 't good geholpe?" Rick zeet: "zeker det, alles is druueg. 't Heet al zeker vief daag neet mieër geraengeldj".



Waat eine puinhoup

Geert reej bie Maikel rechtsóm 't hoes. Dao waas de gróndj gefraesdj, dus Geert kwaam mèt de auto vast te zitte. Noe is det zoeë erg nog neet, mer hae haaj de ker vol mèt puin bie zich. Geert most de puin aaflaje, auto weer losrieje, puin weer oplaje en linksóm langs 't hoes, óm de puin vervolgens weer aaf te laje in de container. Maikel zagt naoderhandj "As Geert dèkker mèt puin kumtj, den weurtj t'r oppe door nog eine henjige klusser".



Oplossing 11 versjille

Steek Micky - Button Chris - Bloom Jas Sjack - Sjaal achtergróndj - Bördje oetgank - Rink Chris - Logo óngersjeijng Paul - Jas Paul - Spotje oet

Erik zuut ze vlege

Erik en Yvon van Logtestijn wore op vakantie op Terschelling. Effe lekker oetweije aan de zieë. Op 't strandj waas eine mins aan 't vliegere. Erik zócht de locht aaf, mer zoog dae vlieger nörges. Yvon zoog hum kieke en vroeg: "Wao kieks se eigelik haer?"

"Jeh", zeet Erik, "Dae mins dao is aan het vliegere, mer ich zeen dae vlieger nörges!" Yvon begos ouch te zeuke, toetdet ze zoog det dae mins neet aan het vliegere waas, mer yoga-oefeninge deej!



Jeugdprins Stan II

Ich bèn jeugdprins Stan de twieëdje.

De aodste zoon van Marcel en Andrea van Bree.

Op 23 augustus 2014 bèn ich in Wieërt gebore

en sinds 'n paar jaor 'ne Moeëreboek gewore.

Same mèt mien breurke Noud woeëne wae oppe Hoeëgstraot, net zoeë as aafgeloupe jaor ouch noe weer de Prinsestraot.

Ein prinses hób ich helaas neet naeve mich staon, mer gelökkig kan ich mèt twieë adjudante door de Vastelaovendj gaon. Dit zeen mien mate Mats en Teun, hieëlemaol te gek en tof, en veur mich ein groeëte steun.

Mien hobbies zeen voetbal en handjboogsjete.

en det zal ederein nao dees daag den ouch wete.

Mèt Teun sjeet ich bie de Lauwerkrans de piele in 't blazoen,

En same mèt Mats sjeet ich 'n belke bie DFO en zeen wae kampioen.

Ich gaon deze Vastelaovendj den ouch veurop inne orde vanne Sjeters.



En det ónger mien motto:



Mèt de voot ane bal en de boog inne handj,

sjete wae door 't Moeërelandj, ALAAF!

**WINNAAR
LEEDJES AOVENDJ 2026**





Weurdje van de redactie

Woeë in veurgaondje jaore de redactie waal 'ns bang waas det d'r neet genógt verhaole wore óm de Kwakel te vólle, waas d'r dit jaor verbazing euver 't aantal verhaole det al tiejes de ieëste vergadering verzameldj waas. Misjien kwoom dit doordet d'r dit jaor versterking waas in de persoeëne van Eefje (Koolen) en Jeroen (Cauven). Wae dinke eigelik det 't des te mieër kumtj door de óngeluefelijke fratse die sommige minse oethole. 't Höbbe van vól verhaole is veur de redactie ein luxe-probleem. Dit beteikentj namelik det er stökskes gesjrappt mótte waere. Waat den waerdj gesjrapptj, is dèk óngerdeil van heftig gesteggel. Soms is ein grappig verhaol gewuuen te moeilik óm good op papeer te kriege (laes: ónkunde van de redactie). Anger kieëre wiltj de redactie minse óntzeen die anges vief kieër inne Kwakel staon (jao, die zeen d'r). Höbtj gae ein verhaol doorgesteurdj det dees editie neet heet gehoordj? Neet getreurd, de redactie heet d'r óngetwiefeldj hertelik óm mótte lache. Wae zeen in eder geval blie det d'r weer eine good gevöldje Kwakel is. En ónthaoj good: d'r is niks aan geloge, 't is allein aaf en toe get minder waar. Vól laesplezeer en wae zeen ós mèt die daag.

De redactie,
Anouk, Bo, Bram, Jos, Lieke, Nicol, Pleun, Eefje en Jeroen

FERMATE
Muziekproducties • Dirigeren • Arrangeren • Componeren •
Producers • Registreren • Presenteren •
Dialectpop • Artiestenbegeleiding • Projectcombo •
Advies m.b.t. muziekprojecten • 'Studio Linje'

06-55703344 • INFO@FERMATE.NL • WWW.FERMATE.NL

smolenAers
Makelaardij BV
VBO register makelaar-register taxateur
Bij Polderte 16
6005 SP Swartbroek
GSM: 06-53198877
Tel: 0495-552113
Email: info@smolenaersmakelaardijbv.nl

21 Joy Nagelstudio

**“Spraakmakende logopedie bij
Logopediepraktijk Eva Strous”**

Clerkx Eierhandel

Garage Heemels

AT Huidzorg



**Print- &
Ontwerpstudio
Leudal**

De Kwakel is ein oetgave van 't kwakelcomité